

曝書亭詩集注

乙卯夏日
葭齋題



楊東孩先生注

皇清書局印行

木石居印行

原序

秀水朱文恪公以名德著萬厯中諸子姓彬彬繼起號能文章四十年來浙西
言文獻者必首朱氏文恪公之曾孫曰彝尊錫鬯最晚出文章之名播海內一
且出諸父之右予考唐史若韋氏杜氏蘇氏崔氏盧氏之屬皆累世為公卿當
時史官至為著宰相世系迄于宋代則有若邯鄲李氏魏郡王氏壽春呂氏河
南韓氏暨范文正韓忠獻父子兄弟其功名率與國運相終始蓋唐宋以來其
重世臣如是錫鬯少逢喪亂棄制舉自放于山巔水涯之間獨肆力古學研究
六藝之旨于漢唐諸儒注疏皆務窮其指歸家苦貧依人遠遊南踰五嶺北出
雲朔東泛滄海登之眾所至叢祠荒冢金石斷缺之文莫不搜剔考證與史傳
參互同異其為文章益竒嗚呼以文恪公之德錫鬯之才不得比于唐宋之世
臣而老于布衣僅以文章自見蓋遇不同矣是可感也錫鬯之文紆餘澄澹蛻
出風露于辨證尤精詩則捨筏登岸務尋古人不傳之意于文句之外今之作

者未能或之先也始順治戊戌予在都下見錫鬯嶺外詩嗟異之康熙甲辰錫鬯過廣陵投予歌詩適予客金陵不及相見丁未始遇于京師中間聚散者不一迨今丁巳予復入京師而錫鬯又將有金陵之行回憶予始見錫鬯詩時忽忽已二十年兩人論交且十有四年而錫鬯與予皆非少壯人矣錫鬯過別予以所著竹垞集屬序予因述其所有感于中者而并道予二人離合之情以遺之錫鬯其亦有感于予言也濟南王士正纂

古今之論博學者不必工于文工文者學不博秀水朱錫鬯幼負異才為太傅文恪公曾孫年十七棄舉子業學古文博極羣書既食貧歷幕府則之豫章之粵之東甌之燕之齊之晉凡山川碑志祠廟墓闕之文無弗觀覽故所作文考據古今人物得失為最工而經傳注疏亦多所發明然世之博學者往往其文不工則何也老子曰當其無有室之用天下之理以實為體以虛為用是故風觸于虛而聲作水激于虛而瀾生博學者惟思自用其實故窒抑煩懣而無

以運之且夫鷗鵬之神也水不從南溟風不搏扶搖九萬里則不能自運何者水狹而風卑則其虛也無幾何地而何以運為然且見聞多則私智勝又好以其偶合穿鑿傳會古今之事故其文愈根據而愈畔於道吾觀錫鬯所論說競競然必稽于古古人所無有弗道也又必折衷聖賢之理而載籍所未嘗明言者每引伸觸類互推而得其說人之始視之也若夏雲之起于空中若城市樓臺觀閣車馬之見于海湄乎不見其根本既而求之則皆有以得其確然之故而援古喻今使言者無罪聞者足戒是蓋所謂能以虛運其實者非邪三吳顧寧人汪荅文博學窮物理予最愛其文有根據而錫鬯皆與為友虛己以下之相與切劘其學又能出新意自見此其文之日工也夫寧都魏禧頓首簞自昔巖穴之士以才名自致通顯圭璋特達使當時重之後世傳之豈不以文章哉乃近古以來未數數見也

今國家崇儒右文英華發於山澤圖史陳於廟堂儒林之盛國士之遇誠千載

一時矣吾友朱太史錫鬯膺博學鴻儒薦天子知其有史才有經學遂登瀛洲之選而校天祿之書入則為起居講幄之儒臣出則為江左人文之司命其所為高文典冊黼黻昇平者盈笥滿架方當與天下共見之乃斯集之刻則皆未遇時之詩古文詞而已未三月以後之著作不與焉噫此足以觀其素履矣蓋錫鬯客遊二十餘載始入嶺南洎乎建業其間自山陰東甌廣陵閩嶠以極於燕趙齊晉雲朔過都歷國登陟遊覽贈答紀述在在多有屐齒所至名流雲集咸欲得其單詞片語以為快錫鬯則旁達肆應出之不窮故其詩古文詞多散在四方今身居館閣恒念疇昔所履之境所交之人與夫誦讀編摩歷寒暑不輟慘澹經營甘苦之味皆有不可忘者爰出戊午以前所作先授剞劂若夫登朝以來史席經筵拂銅鶴之異香撤金蓮之華燭凡所撰述富有而日新適成一代大手筆公之海內以垂示來茲固自有次第也夫錫鬯詩文之美且富無論公卿薦紳爭為矜譽即在遐陬僻壤莫不知之而重之又何俟菰蘆中人贊

一辭哉特以余與錫鬯三世論交深且久蓋自先大父己未登第得以同里後
進奉教於相國文恪公且與楚雄太守君籲公為冬官同舍郎先子復偕子若
子衡兩先生為文章道義之交子莊先生又與先子同舉庚辰進士而錫鬯之
於余則自弱冠以迄于今誼兼戚友情若弟昆晦明風雨垂三十年嘗同舟至
天津濼紆三千餘里艱難共之每偕里中同志十數人倡和雅集或山水讌遊
坐中若無錫鬯便忽忽如有所失曾幾何時而聚散存亡星移電掣余亦以饑
驅奔走四方求如向者會合傾倒之樂已不可復得矣錫鬯雖待制承明迴翔
翰苑然而一念及此則存亡聚散之感其能無動于中乎是刻也不忘其初不
遺其舊可以鏤金石可以被管絃使天下後世傳誦之不朽因以知其素履之
無改焉則其以才名自致通顯也宜哉余故深推其意而序之如此康熙壬戌
二月初吉年家眷同學弟高佑鈺謹序

士之懷才抱璞不苟合於世而山輝澤媚久之光燄難匿忽一旦登金門上玉

堂名動人主傳之後世人謂其遇之奇而不知其所固有也若漢之賈誼司馬相如唐之虞世南李泌宋之陳亮明之宋濂皆能以文章持世運其遭逢特異乎尋常然必數十年而一見蓋亦難矣哉今天下不可謂無其人乃有遇有不遇則時命為之也而究之天地生才國家用之要未有才大而不遇者余中表弟朱子錫堯自總角時已負跼蹐嶽嶠之才飲食經史綜貫百家其驅使風騷若奴隸弱冠出遊歷覽竒勝燕齊三晉以至西吳東粵所與遊處者皆當世名彥錫堯之詩文滿天下蓋已三十年矣其膺薦辟在戊午己未間時余尚淹滯荆南比得以黃冠歸而錫堯在翰院一再通問各相慰幸辛酉秋錫堯以講官出典江南試撒棘後余適館於金陵得暢敘十年之別旅邸未暇論詩文也然甚欲得其別後著作而讀之乃迫于官程匆匆分手俄而表弟高子念祖自京師至謂余曰竹垞諸稿彙梓於涇川吳子岷培將往董其事是集成則兄不可無一言余笑曰白雪之調非寒蟲所能吟青雲之翮非倦鳥所能附今使傾城

傾國如巫女洛神者在座忽有一頭蓬齒脫之嫠婦出而議其高下短長則舉座必捧腹絕倒矣余言安足為錫鬯詩文重哉雖然余又何敢不言也憶往時嘗與錫鬯論詩文余每服其於規矩中獨出手眼匡鼎之解頤充宗之折角殆又過焉固知其當為金華殿中人今果然然則人以為遇之奇者吾正以為學之報也夫趨時者流惟以帖括為捷徑既空疎而無用即名為好古者亦未嘗沉酣饜飲徒襲其郭郭而自以為有得均無當耳後進之士思讀古人書以成名者當以錫鬯為法而遇與不遇則又無論焉此余為天下公言之非私於錫鬯也念祖以余言為何如嶧山顏鼎受

右竹垞文類序

竹垞先生以名高入史館刻其詩文數十萬言既為藝苑職志矣今年丙寅復輯其己未以來詩若文凡若干卷集成見示且屬為之序慎行於先生中表兄弟然名位文章相去絕遠何足以知先生雖然亦嘗從事於文欲有所就正於

先生久矣竊謂唐之文奇宋之文雅唐文之句短宋文之句長唐以詭卓頓挫
為工宋以文從字順為至昌黎之文進學解自言之矣答李翱書則為人言之
矣李漢李翰諸人又言之矣總斬不蹈襲前人一語廬陵推論六藝之華則曰
自能以功業光昭於時故不一於立言而垂不腐而今乃沿襲模擬以空疎不
學之材強為無本之枝蔓不幾為古人所笑乎先生於書無所不窺搜羅遺佚
爬梳考辨深得古人之意而後發而為文粹然一澤於大雅固非今之稱文者
所敢望矣其稱詩最早格亦稍稍變然終以有唐為宗語不雅馴者勿道正始
之音不與人以代興之業此慎行所竊窺於先生嘗欲廣諸同好而因舉私見
以質之先生者也故辱先生之命輒書此以進之海寧查慎行

右騰笑集序

史遷云擇其言之尤雅者柳子厚云參之太史以著其潔文至雅潔品莫貴焉
然非徒汰除俗調以為雅刊落枝詞以為潔也必也才雄而識高資深而養厚

貫天人以為學綜古今以鑄詞乃能超然大雅粹然精潔不則空疎而已矣淺陋而已矣自明中葉偽文競起擬倣蹈襲浮囂鈎棘之病紛然雜出二三君子以清真矯之而莫能救也迄于末年纖佻怪譎軌則蕩然道喪文弊于斯為極迨于今朝人稍覺悟操觚者往往遠宗歐蘇近慕歸唐漸知雅潔之足尚然雅潔未易言也無古人之才之識不得立言之根源而徒求工于枝葉則貌為歐蘇與貌為左史其偽文一也秀水朱竹垞氏天才甚高識趣甚遠自其少時以文鳴世中年學益醇深文益高老入直詞館典大制作退耕長水之上紀事纂言老而不倦既已著書數百卷編成文集又八十卷人皆服其文之富且工而不知其悉本之于學也竹垞之學邃于經淹于史貫穿于諸子百家凡天下有字之書無弗披覽聞逸事無弗記憶蘊蓄宏深搜羅繁富析理論事考古證今元元本本精詳確當發前人未見之隱剖千古不決之疑其文不主一家天然高邁精金百鍊削膚見根辭約而義豐外淡而中腴探之無窮味之不厭是

謂真雅真潔譬猶綴千腋之白以為裘釀百花之露以為樽其與大布之鮮魯酒之清未可同年語矣有華世之文有傳世之文若汪伯玉李本寧諸公名譽雖高卷帙雖富未必可傳竹垞既享當世盛名而異日論今代之文章亦將以竹垞為稱首斯文之正系在焉不可得而磨滅也竹垞之詩若詞傳播人口皆知其工置勿論論其文如此康熙戊子仲春吳江潘未序

康熙戊午朝議修明史

天子慎選局僚

命在廷各舉所知明年己未特開自詔之科

親試體仁閣下擢高等五十人于是秀水竹垞朱先生由布衣除翰林檢討充史館纂修官其後十餘年間同時被用者多改官去或列顯要躋卿貳而先生進退迴翔仍以檢討終老論者以為當史局初開時得先生者數輩專其任而責其成則有明一代之史必可成亦必有可觀若以未盡其用為先生惜者

余獨謂立言垂世先生固自有其不朽者在而史局不與焉先生天資明睿器識爽朗于書無所不窺于義無所不析蓋嘗錯綜人物而比量之其博物如張茂先多識如虞秘監淹通經術如陸德明顏師古熟精史乘如劉知幾劉遵父兄弟貫穿今古明體而達用如馬鄙陽鄭夾漈王浚儀而乃濟之以班馬之才運之以歐曾之法故其為文取材富而用物宏議論醇而攷證確先生嘗謂孔門弟子申黨薛邦後人不當以疑似妄為廢斥謂曲阜縣令宜用周公後東野氏為之謂鄭康成功存箋疏不當因程敏政一言遽罷從祀謂王陽明事功人品炳烈千古不得指為異學輒肆詆毀凡此皆有關名教之大者世徒知先生文章之工而不知其根柢六經折衷羣輔雖極縱橫變化而粹然一出於正如此其稱詩以少陵為宗上追漢魏而汎濫于昌黎樊川句酌字斟務歸典雅不屑隨俗波靡落宋人淺易蹊徑故其長篇短什無體不備且無媿不臻他若商周古器漢唐金石碑版之文以及二篆八分莫不搜其散軼溯其源流往往資

以補史傳之缺略而正其紕繆下至樂府篇章跌宕清新一掃花間草堂之舊
填詞家至與玉田白石並稱先生亦自以無媿也平生纂著曾兩付開雕未仕
以前日竹垞詩類文類序之者多一時名公巨卿高材績學之彥通籍後曰騰
笑集先生自為序并屬余附綴數言者也晚歸梅會里乃合前後所作手自刪
定總八十卷更名曝書亭集刻始于己丑秋曹通政荔軒實捐貲倡助工未竣
而先生與曹相繼下世賢孫稼翁徧走南北乞諸親故續成茲刻斷手於甲午
六月於是八十卷裒然成書矣余里居無事既分任校勘稼翁復來乞序余不
才何足以序先生之文顧念中年從事問學質疑請益受教最深又幸託中表
稱兄弟自謂生平出處之跡以及入朝歸老之歲月與先生有髣髴相似者噫
自己未迄今三十六年向之為先生序集者惟余在耳則推原作者之意以塞
賢孫之請固後死之責也其又敢辭先生有才子名昆田字西峻先十年卒有
詩十卷稼翁遵大父治命附刻於後昔黃氏伐檀集朱氏韋齋集兩翁之傳皆

因賢子今西峻則附名父以傳比於蘇家之有叔黨覽斯編者如讀文忠集而兼得斜川詩非快事歟康熙五十有三年歲在閏逢敦牂且月辛未下瀚海寧

查慎行序

右曝書亭集序

曝書亭集詩註凡例

謙自幼入家塾先子卽命謙讀朱先生鴛鴦湖權歌悉經口講指畫未幾先子下世而謙於先生詩遂不敢棄置爰為註釋

先生用事博瞻經史傳注外如諸子百家以及稗官小說山經地志罔不採用爰為博考詳釋奈見聞有限望漏良多統俟補註

先生舊有竹垞文類騰笑集諸刻與全集中或有題目互異或有字句不同或有數首而刪去一二首者今悉搜采附入以便參攷
先生交遊最廣皆當代名儒山林碩彥姓氏里居間有闕略俟續攷

原集有附刻諸詩仍用單行寫余所采附者用雙行寫呂別之

原集有自註數條每於下文空一字呂別之

鴛鴦湖權歌有譚氏吉聰和作八十八首向係合刻今悉附入後有曹氏次

典和作無從搜採

間有音釋即注於本字下以便觀覽

甄錄

國朝詩約有數種於先生詩有刪易字句者有易它人姓名者俱詳載於下

間有鄙見以按字別之

引用故實如已見前者俱註明見某卷某詩既免重複兼便檢閱

是集近有江氏

浩然

曝書亭詩錄箋注一書僅選三分之一余間有采取者

因其書已刊布不復別為標識

原集編詩二十三卷今序次悉仍其舊復從竹垞文類竹垞集外詩竹垞近詩

騰笑集諸種所遺之詩暨諸選家所采者編補遺二卷

先生遊蹟遍天下著述克棟宇遭逢

盛世歷官翰苑優遊林下垂二十年平生事實甚多乃詳考其家乘行述及靜志居詩話與文集中之有歲月可稽者創為年譜一卷

余家與先生同里凡遇用里中故實郡志邑乘所不載無可援引者以余所
纂梅里志附注焉觀者勿以僭妄為罪余家貧無書都從友朋借閱旋借旋
還無從覆覈其中紕繆甚多儻有指出使得及時改正不致貽誚藝林幸甚
幸甚

先生有四六手稿兩帙向未授梓余亦稍加註釋又先生子昆田笛漁小藁
註尚未卒業統俟續梓

林垞先生像

門弟子
顯仲敬
圖



五經紛綸抽腹筒布鞞

麻屨見

天子歸來著書以沒齒
千秋之名在青史

錢唐龔翔麟拜題

皇清教授徵仕郎 日講官 起居注翰林院檢討竹垞朱公墓誌銘

經筵講官文淵閣大學士兼吏部尚書加三級澤州陳廷敬撰

康熙初北平孫公北海老而家居以經學詔後進子亦往遊焉孫公盛稱秀水朱君錫鬯之賢一時東南文學士游京師者共推為老師宿學子心嚮往焉而莫之能識也後舉博學鴻詞授官翰林已而長直

內庭子朝夕與君相聚甚驩也甫及一年以謫去子亦以他事引嫌求罷仍留書局兩人者時復得以間居相過從為文字之娛游觀之樂數年至今過槐市虎坊之間未嘗不黯然以悲也君既南歸後又數年子扈從河上至吳門得見君於南園至武林又見君於湖上文采風流不殊曩昔而子則頽然且老矣又三年君歿君外孫周子象益以君狀來偕查子悔餘謁銘於子云非夫子孰可誌其墓者予弗敢辭雖然予既不能為信今傳後之文亦姑識其平生出處交遊之節概凡吾意之所不能盡者世之君子庶幾有得吾兩人心於語言

文字之外則君有銘而予亦可以無憾矣君諱彝尊錫冕其字號竹垞先世居吳中自吳江遷秀水高祖諱儒以醫顯官至奉政大夫太醫院院使以子貴贈光祿大夫柱國少保武英殿大學士曾祖諱國祚以醫院籍由順天府學中萬歷壬午鄉試癸未進士第一人除翰林院修撰歷官吏部右侍郎引疾歸光宗初起南京禮部尚書入東閣加太子太保進文淵閣尋以戶部尚書兼武英殿大學士加少傅歸卒贈太傅謚文恪文恪公六子長諱大競仕至雲南楚雄府知府子五人長茂暉以廕授中書科中書舍人好學問樂取友為復社宗盟輯禹貢補注君嗣父也本生父諱茂曙楚雄公第二子也天啟初補秀水學生甲申後棄去卒私謚安度先生撰兩京求舊錄有春草堂遺稿安度先生子三人君其長也舍人無子以序立君為後君少而聰慧絕人生數歲嘗見諸神物異怪狀不類人世及他人視之輒無所見書過眼覆誦不遺一字塾師舉王瓜使屬對君應聲曰后稷師怒答之為舉業文千言立就已能工詩崇正十三年

浙東西大旱飢人相食自文恪公以宰輔歸里家無儲粟楚雄公清廉安度先
生貧至絕食君守書冊自若也既而曰河北盜賊中朝黨朋亂既成矣何以時
文為不如舍之學古乃肆力於周官禮春秋左氏傳楚辭文選丹元子步天歌
人皆笑以為狂迂未幾亂果作君年十七贅婚嘉興練浦之陽馮村馮公有客
王鹿柴華亭名士也見君大奇之曰此必以詩名世後君名益高四方以幣聘
者爭集其門所至皆以師賓之禮遇焉客遊南北必橐載十三經二十一史以
自隨已而遊 京師訪孫公於退谷公過君寓見插架書謂人曰吾見客長安
者務攀援馳逐車塵蓬勃間不廢著述者惟秀水朱十一人而已君既以博學
徵試之 殿廷相國馮公得其文歎曰奇才
召以檢討充

起居注

日講官在

內直間語予曰公直似益都清如曲沃予謝不敢當以君之賢至今思其言因以自策勵其亦不得不謂之知言也歟君雖以被劾鐫一級罷尋復原官歸里後數年

駕巡河上至江浙

賜御書四字曰研經博物禮遇之隆固無替於昔時也君既退而著書有日下舊聞四十二卷經義考三百卷明詩綜一百卷瀛洲道古錄若干卷五代史注若干卷禾錄若干卷齋志若干卷齋志者通政使曹公寅與君合撰者也曹公為君刊曝書亭集八十卷未卒業而君歿君之自立如此回視京華儕輩奔走塵埃中所辛勤而僅有者猶秦華之於邱垤哀遲蹇鈍之人張張然莫適從也得失之林亦可考而知已君間居謂其孫稻孫曰凡學詩文須根本經史方能深入古人窠奧未有空疎淺陋勦襲陳言而可以稱作者記云時過然後學則勤苦而難成獨學而無友則孤陋而寡聞予舉此以為教子弟之法焉君在翰

林預修一統志主考江南

覃恩授徵仕郎貤贈生父家居十有九年康熙四十八年十月卒年八十一配馮孺人歸安儒學馮君鎮鼎女前十六年卒子一人昆田國子監生賢而有文

前卒女二人一適吳江周能察一適桐鄉貢生錢瑛孫二人桂孫國子監生稻

孫府學生曾孫男二人振祖賜書孫女二人銘曰

或史而野或經而葩物亦有然為蓬為麻嗚呼竹垞天邪人邪得于天者既碩孔多人其謂何

曝書亭集詩註總目

卷一

詩一百二十二首

卷二

詩一百一首

卷三

詩七十七首

卷四

詩八十一首

卷五

詩一百二十八首

卷六

詩五十八首

卷七

詩七十六首

卷八

詩一百二十九首

卷九

詩八十一首

卷十

詩八十一首

卷十一

詩七十首

卷十二

詩六十九首

卷十三

詩九十一首

卷十四

詩七十六首

卷十五

詩七十八首

卷十六

詩五十五首

卷十七

詩六十九首

卷十八

曝書亭詩言
卷十九
詩四十八首

卷十九

詩八十五首

卷二十

詩九十一首

卷二十一

詩四十首

卷二十二

詩三十六首

曝書亭集詩註總目

男 蟠 校

杭 吳 灝 重 校

朱竹垞先生年譜

同里後學楊謙篋

先生諱彝尊字錫鬯號竹垞行十晚號小長蘆釣魚師又號金風亭長秀水人移居嘉興梅會里

始祖諱煜字西灣明景泰四年自吳江盛澤之三家村贅於秀水商河陳氏遂家焉

七世祖諱福緣字耕樂恩例冠帶壽官

六世祖諱恭字月梅鄉飲賓以文恪公貴贈光祿大夫柱國少保太子太保戶部尚書武英殿大學士

五世祖諱彩字慕萱以文恪公貴贈官如前

高祖諱儒字宗魯號東山以醫顯仕至奉政大夫太醫院院使以子文恪公貴贈官如前事詳韓世能纂墓誌

(嘉興府志)朱儒由吳江徙居秀水善醫昆弟四人析產皆讓弟入都值大疫治活無算授太醫院吏目後陞院使嘗侍疾禁中神宗御文華殿暖閣召儒切脈儒奏聖體病在肝腎宜寬平以養氣安靜以益精上首頷之兩宮太后及后妃公主有疾率令中涓言狀從儒授方士大夫爭相倒屣所得俸入多濟困阨貧者不受其藥資或潛置藥帖中更周其急里中人客死者倡義經紀其喪年七十七卒(嘉興縣志)宮中用蟾蜍錠於每歲端午日修合各坊車載蝦蟆至醫院者億萬計往時取用後率斃蓋兩目俱廢不能跳躍也東山朱公典院事命止刺其一偏得甦者甚多此事似微然發念甚真為德不淺

曾祖諱國祚字兆隆號養淳萬曆壬午經魁癸未賜進士第一人除翰林院修撰知起居注歷司經局洗馬遷諭德進右庶子戊戌以禮部左侍郎兼翰林院侍讀學士攝本部尚書事壬寅轉吏部右侍郎引疾歸光宗即

位起南京禮部尚書是年命入東閣加太子太保進文淵閣尋以戶部尚書兼武英殿大學士加少傅回籍卒贈太傅謚文恪賜祭葬崇祀忠孝祠敕建清師百世坊事詳明史

(志林)朱文恪公為人謙易值大暑其子某張蓋走道中持蓋者不自歛束至損小戶一篷猶罵不止小戶莫敢言後數日鄰人以其事聞於公公呼其僕責之且遺小戶金慰以善言嗣是其子出竟不張蓋李臨川先生時稱其事為士大夫勗

祖諱大競字君顓號忱予由官生除都察院照磨歷都事署經歷司天啟初授階修職郎轉後軍都督府經歷司都事晉階文林郎尋陞太僕寺丞遷工部營繕清吏司主事奔文恪公喪回籍時御史梁夢環羅織朝士之不附己者誣奏公協理馬政邊餉虧額下法司提問會莊烈帝即位公入都上疏自訟獲免出知楚雄府事詳茂皖纂忠貞服勞錄

父諱茂暉字子若號晦在秀水學生承祖蔭授中書科中書舍人以先生
貴

敕贈徵仕郎 日講官起居注翰林院檢討

公好博覽經史之外諸子百家靡不兼綜性樂取友復社第一集同盟
奉為倫魁所輯禹貢補註徐閣公謂當與程泰之傅同叔並傳

本生父諱茂曙字子衡增廣生甲申後棄去及卒鄉人私謚安度先生以

先生貴貤贈如前官子三人先生其長也以序嗣晦在公後弟

彝鑿彝玠

事詳汪琬墓誌

靜志居詩話本生考安度府君早歲以文受知於吳范君

文若 既而侯

官曹公學佳鄭公瑄崑山顧公錫疇鎮海何公楷上虞倪公元潞崇德吳

公之屏交相賞激暇寫山水作行楷書董尚書其昌見而歎曰不出十

年子當亂吾真吳家貧無析產崇禎中歲飢飛蝗蔽天人相食先妣唐

孺人率兩姊刺繡衣裙易米日趨乃炊府君絕無憂色奕譜畫鑑覆局
開圖不改其樂也遭亂盜劫者再青檀盡失凡九遷而定居長水敝衣
破帽口不談天下事惟與里中耆老枯棋一局濁醪數杯以消暇日

故明崇禎二年己巳先生一歲

八月二十一日未時先生生於碧漪坊舊第

三年庚午二歲

四年辛未三歲

五年壬申四歲

十一月曾祖母何太夫人卒賜祭一壇特恩加祭一壇祖君顯公時知雲

南楚雄府事甫八月聞訃力不能具舟楫巡撫御史姜公思睿語察察

曰朱守可謂身處脂膏不能自潤今萬里長途豈能步還乃各率私錢

贈行府治百姓拒輪於道爭賦歌詩謔辭以述德取陸續故事繪圖題

曰鬱林石其謠曰清貧太守一世難百鳥有鳳鳳有鸞鬱林石所載也
先生生數歲屢覩神物異怪之狀從旁者輒無所見

六年癸酉五歲

七年甲戌六歲

始就家塾塾師胡先生偶舉王瓜俾作對先生應聲曰后稷師怒欲加

夏楚叔希園先生

茂曉字子希

見而竒之

八年乙亥七歲

先生祖母徐安人徐文貞公

階

曾孫潘恭定公

思

女孫所出時塾師課

以屬對不協安人因以恭定所訂詩韻輯略授先生自是知別四聲矣

胞弟

彝鑿生

九年丙子八歲

謁姚尚書

善長

時年九十與文恪公同榜進士嘉興九人至是惟尚書

十四在

三月祖母徐安人卒

六月祖母顓公卒

十年丁丑九歲

文恪公克天啟二年會試總裁官是科中式四百人寶應喬侍御可聘
與焉至是巡按浙江既入境屬吏伏謁道左侍御首詢文恪公第宅吏
以鍾秀坊對旌蓋闐於藉袈之橋侍御自巷左舍車徒行百步入自門
升階肅衣冠拜祠下復坦步出巷之右乃升車鼓吹導以行於時弟子
敬其先師若是

十一年戊寅十歲

同譚舟石

吉聰

左羽

瑄

陸孝山

世楷

義山

業請業於希園先生日記萬

言

時阮大鉞居白下南國諸生顧景等一百四十人具揭攻之吾鄉之士
有八安度先生謂先生曰治小人不宜過激

十二年己卯十一歲

胞弟彝珩生

十三年庚辰十二歲

先生讀時藝日二十餘篇每發一題下筆千言立就於詩藝尤工五經
進士譚元孩貞良以國士許之

嘉興道署中向有白猿時萊陽宋公繼登備兵嘉湖夜竊其衣冠服之
擗鼓升廳事海寧袁秀才株留幕中猿入臥室披其帷公命隸卒環守
而猿之往來如故也一日先生偕諸弟弟行精嚴寺街人爭聚觀謂猿
方坐鐘樓咬果先生審視獨未之見

十四年辛巳十三歲

時浙東西大旱飛蝗蔽天歲饑人相食安度先生家計益窘嘗至絕食
叔祖君永大定通判成都以蜀江米四斛貽安度先生米色殷而糲食
之鮮可以飽先生讀書自若也

十五年壬午十四歲

時文尚浮華駢麗帝園獨賞黃陶菴文以稿授先生既而語曰河北盜
賊中朝朋黨亂將成矣何以時藝為不如舍之學古乃授周官禮春秋
左氏傳楚辭文選丹元子步天歌人皆笑以為迂

十六年癸未十五歲

先生隨第六叔父子蕃

茂曜

觀卜氏藏帖中有漢淳于長夏承碑證為

宋拓是時已解隸法矣

皇清順治元年甲申十六歲

按先生詩話鄭端簡公築別業於城東北隅穿池中央四面種蔬藥

賓客至者燕於池上百可亭嗣先妣為公來孫余嘗讀書其地又沈上舍章為亡弟千里婦翁所居苧莊略約相通環以水竹余嘗讀書其地此二條不知時日附識於此

二年乙酉十七歲

春賢馮教諭鎮鼎宅在碧漪坊去文恪公第近止百步

馮孺人名

福貞

字海媛年十五

華亭王鹿柴廷宰過馮翁小飲見先生問曰曾學詩否對曰未也鹿柴

曰詩有一學而能者有終身學之而不能者洵有別才焉酒至舉古人名俾作對如顧野王對沈田子鄭虎臣對沈麟士蔡興宗對崔慰祖蕭子雲對任伯雨魏知古對顏相時吉中孚對溫大有楊完者對晁補之杜審言對蕭思話貢師泰對齊履謙任蠻奴對張惡子金安上對鄭居

中劉辰翁對逢丑父韓擇木對李栖筠蔡有鄰對徐無黨王右叟對阮

佃夫李思齊對石作蜀柳三變對張九成鄭櫻桃對郭芍藥王僧綽對
馬仙琕秘彭祖對庾黔婁劉方平對徐圓朗劉仁本對范道根之類鹿
柴語馮翁曰此子將來必以詩名世其取材博矣

夏安度先生去碧漪坊舊第避兵夏墓蕩

先生隨外父馮翁徙馮村五兒子橋在練浦塘東與友壻姚我士澗共
學

九月本生母唐孺人病終丙舍

先生朝夕擗踊每上食號慟不能起

曝書亭集編年始此

三年丙戌十八歲

留馮村安度先生攜先生兩弟遷塘橋之北

四年丁亥十九歲

生祖母蔡孺人卒

五年戊子二十歲

讀書烏木橋村

長子德萬生

六年己丑二十一歲

移居梅會里

先生挈馮孺人至塘橋侍養安度先生所居隘遂賃梅里道南茅亭之

居迎安度先生至里旋移居接連橋與里中王介人相周青士貧繆天

自泳沈山子進李斯年繩遠武曾良年分虎符諸先生為詩課時先生

貧甚餘一布袍斯年兄弟止一偏提每遇會則以付質庫兩家內相各

紡績出之遇後會復然於是遠近稱詩者咸過梅里就先生論風雅流

派靡不心折曹侍郎溶見先生詩文尤賞激不置時先生與山子先生

齊名鄉人目為朱沈

輯樵李先民詩

七年庚寅二十二歲

授徒里中

赴十郡大社

(按毛奇齡駱明府墓志駱姓諱復旦字叔夜山陰人嘗同會稽姜承烈

徐允定蕭山毛姓赴十郡大社連舟數百艘集於嘉興南湖太倉吳偉

業長洲宋德宜賈頴吳縣沈世英彭隴尤侗華亭徐致遠吳江計東宜

興黃永鄒祇謨無錫顧宸崑山徐乾學嘉興朱茂明彝尊嘉善曹爾堪

德清章金牧金范杭州陸圻越三日乃定交去又按尤侗悔菴年譜順

治七年庚寅宛平金治公鏊孝廉來尋盟盟者十子彭雲客隴繆子長

慧遠章素文在茲吳敬生愉宋既庭實頴汪苔文琬宋石之德宜宋疇

三 德宏 金及予也予與彭宋計甫草 東 舉慎交社七郡從焉秋往衢州

訪李庚生 際期 觀察遇陳公朗 煥 太史于柯山訂南湖之約則事在庚

寅明矣但未審何月耳

長女生

適吳江
周能察

八年辛卯二十三歲

里中授徒

九年壬辰二十四歲

長子

德萬 卒

八月次子 昆田 生

昆田 字文盤號西峻行十初名德壽小名阿鏐又名掌穀

十年癸巳二十五歲

容華亭

十一年甲午二十六歲

春遊吳門

秋復至吳門

十二年乙未二十七歲

三月遊山陰

外舅馮翁以歲貢生選授紹興府學訓導先生往遊焉過梅市訪祁公

子理孫班孫

十月既望遊橫山

同遊者周青士

質

繆於野

永謀

鄭隨始

明

沈山子

進

先生題名於壁

按文

類止周繆
沈三子

十二月遊柯山

偕山陰祁奕慶

理孫

奕喜

班孫

奕儀

敷

奕明

誠孫

觀柯山石像題名寺

壁

次女生 適桐鄉貢生錢琰

十三年丙申二十八歲

夏遊嶺南

海寧楊公 雍正 知高要縣事以幣聘先生課其子 中訥 即晚研先生也

十四年丁酉二十九歲

留嶺南時同里曹公 落官 廣東左布政使輯嶺南詩選先生為之甄錄

焉

先生舅氏查君 培繼 宰東莞曾過訪留宿

十五年戊戌三十歲

四月將歸訪南雄守陸君 世楮

留解北西爽亭五月朏同遊揚歷巖觀瀑布水各成古風一篇并書歲

月姓名於龍祠之壁

六月既望烏江謁項王祠題名乃還

十一月初八日移居梅里荷花池上

注歐陽修五代史記

引同里鍾廣漢淵映為助廣漢力任鈔撮羣書

輯嶺外詩一卷

十六年己亥三十一歲

春遊山陰

七月曹倦圃洛來會

十月訪蔣楚樞之翹

靜志居詩話予年十七避地練浦歲己丑萑苻四起乃移家梅會里里

在大彭嘉會二都之間市名王店或曰石晉時鎮遏使遷居此故名或

日宋尚書居正之宅或曰元學士景家於是或曰元學正綸也傳聞各異己亥十月訪蔣布衣之翹於射襄城蔣語予曰子知王店之所由名乎洪武中孝廉鏞及弟鈞之所居也因出其所輯樵李詩乘則二王詩俱在焉并出二王合刊詩稿舊本共一冊燈下讀未竟客至轟飲而罷十七年庚子三十二歲

五月寒山盜晝劫梅里

按靜惕堂集有五月十九日梅里為盜所劫因寄山顏錫堯山子青士諸子詩

九月晦日題杭州酒樓壁

十月客山陰宋觀察琬幕中

宋荔裳答曹倦圃書朱子錫堯齋手書來并獲讀扇頭長篇情辭斐然風格道上知先生於此事直復欲擠古人錫堯王謝家風瓊林掩映

其羽儀令人不衣自暖愧非蓮幕何敢維繫高賢把酒論文之餘僅得一介以資蠟屐殊使湖山笑主人耳

十一月朔題黃子久浮嵐暖翠圖

寓山陰之簞醪河飲于萊陽宋公之解斟隗囂宮綠瓷瓊勸客蒸菜雞為餅出浮嵐暖翠圖以示客是日南昌王于一敬定長洲宋既庭實頴

金壇蔣虎臣起仁和陳康侯晉明吳江葉星期雙同觀

同宋觀察遊雲門山

舟中觀許旌陽移居圖係崔子忠畫

同王于一至叢山訪劉伯繩

伯繩名為念臺先生長子先生訪念臺遺書出三禮草稿視之明年再訪不復得見矣

十八年辛丑三十三歲

春留山陰

夏寓西湖昭慶寺

時先生與曹潔躬周元亮施尚白諸先生先後來遊杭人有持元西湖
竹枝請曹先生甲乙者先生謂曰和者雖多要不若老鐵次日羣公泛
舟於湖曹先生引杯曰鐵崖原倡之外誰為擅場各舉一詩不當者罰
周先生舉陸仁良貴作云山下有湖湖有灣山上有山郎未還記得解
儂金絡索繫郎腰下玉連環施先生舉張簡仲簡作云鴛鴦胡蝶盡雙
飛楊柳青青郎未歸第六橋邊寒食雨催郎白苧作春衣南昌王猷猷定

于一舉嚴恭景安作云湖中女兒不解愁三五蕩槳百花洲貪看花間

雙蛺蝶不知飛上玉搔頭吳于于令昭舉強珣彥乘作云湖上女兒

學琵琶滿頭都插鬧妝花自從彈得陽關曲只在湖船不在家鄒祇謨

訐士舉申屠屠衡仲權作云白苧衫兒雙髻丫望湖樓子是儂家紅船撐

入柳陰去買得雙頭茉莉花錢唐胡介彦遠舉徐夢吉德符作云雷峰

巷口晚涼天相喚相呼出采蓮莫為采蓮忘却藕月明風定好迴船蕭

山張杉南士舉繆侃叔正作云初三月子似彎弓照見花開月月紅月

裏蟾蜍花上蝶憐渠不到斷橋東山陰祁班孫奕喜舉釋文信道元作

云湖西日脚欲没山湖東月出牙梳彎南北兩峯船上看恰似阿儂雙

髻鬟錢唐諸九鼎駿男舉馬琬文璧作云湖頭女兒二十多春山兩點

明秋波自從湖上送郎去至今不唱江南歌先生曰諸公所舉皆當未

若吳興沈性自成之作也其詞云儂住西湖日日愁郎船只在東江頭

憑誰移得湖山去湖水江波一處流不獨寄託悠遠且合竹枝縹緲之

音曹先生曰然於是諸公皆飲先生亦浮一大白

十一月母鄭孺人卒

康熙元年壬寅三十四歲

四月復至湖上

與周青士鍾廣漢弟千里采蓴西湖先生貯以瓦盆攜歸長水

九月訪外舅馮翁於歸安學舍

十月偕王明府世顯之永嘉

曹侍郎餞之江上韋二為彈長亭之曲并吹笛送行

過縉雲訪蔣廣文薰

馮翁卒於歸安學舍年七十四

二年癸卯三十五歲

春弟千里至永嘉

十一月十四日安度先生卒年六十三

安度先生病革先生忽心動辭歸未旬日而安度先生去世

三年甲辰三十六歲

五月將之雲中謁曹侍郎洛李武曾良年作序送行

二十日自武林回里同高念祖佑鉉北行

六月至揚州投詩王司理士正

王阮亭答朱錫鬯過廣陵見懷之作桃葉渡頭秋雨繁喜君書札到黃昏銀濤白馬來胥口破帽疲驢出雁門江左清華惟汝在文章流別幾人存曹公橫槩懸相待共醉飛狐雪夜尊

閏六月廿二日發揚州

時念祖同舟至天津書篋中攜春秋意林凡十九卷七月暑未退先生揮汗讀之

八月十五夜集天津曹武備斌官舍

廿一日至都門寓查王望培繼齋

九月初十日出都十九日達雲中

時曹侍郎官山西按察副使治大同舍先生於萬物同春亭

與李武曾論文書 與查韜荒書 與高念祖論詩書 倦圃圖記

跋師子林書畫冊 天津衛稽古閣重修藏經記 大悲院記

四年乙巳三十七歲

正月二十日遊應州木塔寺

同遊者三人山西按察司副使同里曹公溶江西布政司參政臨清周

君之恒汾州推官大興孫君如銓先生作文記之鑣先生文於壁者知

州事蓋州傅君登榮也

二月同曹副使出鴈門關

四月初五日弟彝鑒卒

秋再度鴈門關至太原

過晉祠集杜少陵詩句文章千古事社稷一戎衣書於唐太宗碑亭柱

富平李因篤見而賞其工因遺書與先生定交時先生欲注五代史以
五代之主其三皆起晉陽最後劉昫三世固守其地恒策馬縱遊覽其
廢墟塚墓之文祠堂佛刹之記靡不搜剔以資考證

輯吉金貞石志粉墨春秋風庭掃葉錄等書

衡方碑跋 書尹宙碑後 唐濟安侯廟二碑跋 晉王墓二碑跋

五年丙午三十八歲

客山西布政王公顯祚幕

入春擬為平陽之遊適撫軍屬禁遊客左布政廣平王公留館幕中公
所藏白玉碗直累千金用以讌先生先生愛之俾留書屋命厨人月致
桑落酒二甕時同里王公庭官右布政公子滋萬援隨侍一垣之隔朝

夕晤言

二月遊晉祠登天龍山

先生遊晉祠記云丙午二月予經天龍之山道經祠下息焉

三月遊風峪觀石刻佛經

太原縣西五里有山曰風峪環列所刻佛經凡石柱一百二十有六先生謀於王方伯顯祚曹副使溶將啟而徙於晉祠築亭貯之有方便君持不可乃止

八月至蒙山訪碑

曹副使溶以入閭至太原借先生樞馬訪金石刻文字因出郭抵晉祠宿朝陽觀由風峪登天龍山轉入蒙山題名寺壁

文水縣卜子祠堂記 好妨廟碑 卦山題名 唐郭君碑跋 晉史 匡翰碑跋 北漢千佛樓碑跋

六年丁未三十九歲

二月望遊崛岉寺

寺在太原府治西三十里同遊者王公子千之

三月三日重遊晉祠

同永年趙秋水

湛

桐鄉孔子威

興雋

楔飲題名於壁

秋王方伯

顯祚

落職先生自代州復至雲中訪曹副使

副使雅好先生填詞酒闌燈地更迭倡和甫脫稿即為銀箏檀板所歌

西河詩話曹侍郎使陽和時與客早飯有言關廂外為集頗盛遣門客

倪生往視歸詢之云無可銜物祇一建窰大士像甚佳其龕製亦雅惜

指已壞其一非全玩也侍郎云房中人正需此作禮供具盍估之遂出

錢一緡粥以示妾妾翦墨紗障龕門晨夕作禮甚虔且窰及踰年將去

陽和侍郎慮馱負累墜謀送之僧舍妾不可決計請行因開障捧其像

出裹以綿仍置龕間視之則五指完具並無壞家人大駭以報侍郎不

信且疑當時或未壞回憶間適朱檢討竹垞至竹垞當時見其事與質

記並言壞一指無異時有誦雲門千指頌以相答者曰乃知千手指只作無指觀此竹垞在京師飲次為予言

八月初至宣府晤李秋錦良年客守備嚴公偉宏幕

入都與譚舟石吉聰同寓

與王阮亭士正會

阮亭朱錫堯自代州至京奉東詩短後曾將代馬騎談兵絕塞偃牙旗

錦囊舊事悲唐壘碧玉春流寫晉祠朱有晉祠記最工燕市雪深衣褐敝吳江

風落酒船遲鴛湖若買三間屋得便從君下釣絲

訪孫退谷承澤於北平

退谷謝客著書不妄延接一見先生即訂忘年之好先生客遊南北必橐載十三經二十一史諸書自隨退谷過旅寓見插架謂人曰吾見客長安者務攀援馳逐車塵蓬勃聞不廢著述者惟秀水朱十一人而已

靜志居琴趣成

崛巘寺題名 重遊晉祠楔飲題名 唐朱邪府君墓銘石蓋記 平

定州唐李謹妣神頌跋 王禮部詩序 鍾廣漢遺詩序 周鼎銘跋

書王純碑後 題楊補之墨梅

七年戊申四十歲

春自 都至山東客巡撫劉公

芳躅幕

重修泰安州東嶽廟碑 澁泉記

八年己酉四十一歲

春登嶧山

山在鄒縣之南同登者劉公

芳躅

公弟

芳永

河間府推官大興牛

裕范

歛人汪之魴

過鄒縣謁孟子廟

遊曲阜謁孔林謁周公廟

先生贊劉公疏請封周公後裔為五經博士公即屬代為作奏將聞於朝矣吏言前巡撫周公有德曾請而不允劉公不為奪會柯給事贊疏

請以方孝孺從祀孔子之廡為部臣駁詰幕客以此阻公事不果上

（先生鄭固碑跋己酉之春泊舟任城南池之南步入州學見儀門旁列漢碑五左二右三郎中鄭君固碑其一也碑文全漫漶不可辨識舍之去又開元太山銘跋歲在己酉五宿茲山之麓

五月泛舟蓮子湖飲歷下亭

秋歸里墓安度先生唐孺人於長水東之婁家橋

買宅於鄰宅西有竹因以竹垞自號焉

為子昆田娶婦

宿州衛守備沈石文槃女

冬復往濟南挈昆田以行沈武功送之落帆亭畔

登嶧山記 謁孔林賦 題歷下亭 胥山題壁

九年庚戌四十二歲

八月自濟南入都

重訪孫退谷屬題竹垞二字

釋圭 答孫侍郎書 王維伏生圖跋 李龍眠九歌圖卷跋 曹全

碑跋 送曾青藜序 書淳化閣帖夾雪本後 周延陵季子劍銘跋

郎中鄭固碑跋 漢丹水丞陳宣碑跋

十年辛亥四十三歲

正月遊西山

偕同里李良年吳江潘未上海蔡湘自人日己未迄於壬戌凡四日題

詩於壁傳鈔者不絕一時朝士爭投縞紵每名客輒詢坐中有朱李者

三月出 都之維揚

上巳前一日曹

貞吉

黃仍緒沈眉范喬萊汪懋麟曹禾高層雲李

良年

諸名士飲餞於郊賦詩贈行

與寧都魏冰叔

禧

定交

屬錢唐戴葭湄

蒼

畫烟雨歸耕圖

竹垞文類成新城王

士正

寧都魏

禧

簪序

西山祕魔崖題名

西山宏教寺題壁

看竹圖記

十一年壬子四十四歲

二月長孫

桂孫生

原名桐孫字楫師號巖客

四月旋里

六月至福州同飲人程

埕

遊鼓山

八月復入都

題顧長康女史箴圖 題福州長慶寺壁 鼓山題名 聖教序跋

五經翼序 朱人遠西山詩序 續題曹全碑後 蘭亭神龍本跋

江湖載酒集成嘉善曹爾堪 吳江葉舒崇纂序

十二年癸丑四十五歲

舍館宣武門右輯詞綜

二月遊大房山

同劉增美芳躅宣人芳詰涿州馮子湛源漳華亭錢介維柏齡遊題名

此岩

秋客潞河龔僉事佳育幕中

十三年甲寅四十六歲

留潞河屬海陵曹次岳岳寫竹垞圖

作鴛鴦湖權歌

譚舟石

吉總

和韻合刊葉封繆永謀李符纂序

十四年乙卯四十七歲

六月晦在先生歿於項氏寡姊之室年七十八

九月自潞河奔喪回里

經廣平前方伯王公

顯祚

出郭相慰唁

十五年丙辰四十八歲

復客潞河

葉指揮詩序 春秋意林序

十六年丁巳四十九歲

龔僉事擢江寧布政司先生偕至江寧

十七年戊午五十歲

時

聖祖仁皇帝法古制科取士

詔在廷諸臣暨督撫大吏各舉博學之彥毋論已仕未仕徵詣闕下總督倉場戶部侍郎嚴公沆吏科給事中李公宗孔等交薦先生

夏自江寧應

召入都舍於三里河橋之南泉寺與李徵士良年同寓十月一日奉

上諭各大臣題薦才學官人除現任員外著戶部帖給俸廩并薪炭銀兩按月

稽領

蕃錦集成柯維楨序刊行之

詞綜成汪森增訂付梓

白玉盃記 萬柳堂記 蔣京少梧月詞序 溪州銅柱記跋

十八年己未五十一歲

三月朔

召試太和殿廷發題璿璣玉衡賦并四六序省耕詩排律二十韻學士院散官

紙光祿布席

賜讌體仁閣下中使傳

旨向來殿試進士定例立而對策今以爾等績學博聞特

賜坐 賜食僉謝

恩畢既納卷閣臣以八十卷進 呈次日

天子行大蒐禮次鄧州束卷授大學士高陽李公霽寶坻杜公立德益都馮公

溥掌院學士葉公方藹定其高下益都讀先生卷歎為奇絕

天子親拔置一等得除翰林院檢討充明史纂修官

四月二十日到任

各朝服頂帶于欽天監火神廟齋到衙門行禮畢次日遂赴史館

同籍五十人集於衆春園做題名故事各賦詩一首施閩章為之序

五月開局內東華門外先生分纂文皇帝紀

家起原任翰林院掌院學士徐公元文為監修官翰林院掌院學士葉

公方藹右春坊庶子兼侍講張公玉書為總裁官

七月移寓虎坊橋與徐檢討欽僦舍同居

送李檢討因篤終養

天生入史館亟上書陳情請歸養其母先生餞之慈仁寺揮涕而別

錢唐龔翔麟取先生所著江湖載酒集李良年秋錦詞李符耒邊詞沈

皞日茶星閣詞沈岸登黑蝶齋詞與紅藕莊詞合刻於金陵名浙西六

家陳維崧纂序

輯瀛洲道古錄

是書分十五門制誥講讀儀注選任論議書籍燕賚纂修記注使命典

型解字官制雜志附志

春蒐賦 史館上總裁七書 先君子五言詩書後

十九年庚申五十二歲

正月作平蜀詩進 呈

四月充

廷試讀卷官

七月晦日 賜藕

夏秋間疾疢時作至閏八月初旬遂爾大劇誤服涼藥幾死者兩次亟投參苓桂附乃始得痊力欲請假歸里掌院不允

冬分撰明史文苑傳又分撰嘉靖諸臣傳

得鄭端簡曉及王廷相顧璘弟璠王韋陳沂顧應祥雷禮黃光昇朱

希周尹臺孫承恩承口口宏陸樹聲弟樹德子彦章陶承學子爽齡望

齡諸公傳

送周郎中還琴山序

二十年辛酉五十三歲

是年

命增置

日講官起居注八員先生與焉

四月充

廷試讀卷官夏日

瀛臺侍直

五月丙子侍宴保和殿

七月典江南鄉試拜

命之日屏容不見既渡江誓於神入闈矢言益厲關節不到得胡任輿陸肯堂

黃夢麟等盡知名士人皆悅服

何焯讀書敏求記跋絳雲未燼之先藏書至三千九百餘部而錢遵王此記凡六百有一種皆紀宋板元鈔及書之次第完闕古今不同手披目覽類而載之遵王畢生之菁華萃於斯矣書既成局之枕中出入每自攜靈踪微露竹垞謀之甚力終不可見竹垞既應名後二年典試江左遵王會於白下竹垞故令客置酒高譙約遵王與偕私以黃金翠表予侍書小史啟鐫豫置楷書生數十於密室半宵寫成而仍返之當時所錄并絕妙好詞在焉詞既刻函致遵王漸知竹垞詭得且恐其流傳於外也竹垞乃設誓以謝之又跋遵王纂成此書秘之歿中知交罕得見者竹垞檢討校士江南日龔方伯遍召諸名士大會秦淮河遵王與焉是夕私以黃金青鼠表予其侍史啟篋得是編命藩署廊吏鈔錄并得絕妙好詞既而詞先刻遵王疑之竹垞為之設誓而謝之不授人

也按柯崇樸絕妙好詞序云往余與朱檢討竹垞有詞綜之選披拾散逸採掇備至所不得見者數種周草窗絕妙好詞其一也嗣聞虞山錢子遵王藏有寫本余從子煜為錢氏族婿因得假歸然傳寫多訛迨再三參攷始釐然復歸於正爰鏤板以行之據此則非先生所詭得矣義門之言近証

九月周簞谷篋訪先生於江寧

先生周君墓表予典江南秋試榜既發德州田公雯為予張燕君適造予道遇曲阜顏君光敏偕之來布衣紉屨眾賓皆睟貽顏君語曰此浙西詩人周青士也諸公未之識乎田公肅君上坐懽飲而散

十月遊攝山

同周篋王翬李符龔翔麟邵瓊弟彝珩從子建子為攝山之游信宿乃還鄭篋以分書題名於壁王翬圖為行看子各紀以詩

雲南平捷聞

聖祖謁

世祖陵告成功上

太皇太后

皇太后徽號

頒詔大赦天下諸臣皆

覃恩封贈如其官先生授徵仕郎馳贈本生考安度先生

跋南朝史精語 梁始興安成二王墓碑跋 跋唐明徵君碑 與胡

解元書 江南鄉試策問三首 天發神讖碑考序 唐濮陽卞氏墓

誌銘跋

二十一年壬戌五十四歲

春復

命入都蔚州魏公象樞衣朝衣造先生再拜曰吾非拜君也慶朝使之得人

也

馮孺人由水路北上無家具僅載書兩大簾盜劫所居止餐錢二千文
白金不及一鎰

天子有事春蒐先生侍班 乾清宮

四月充

廷試讀卷官

五月

駕在瀛臺先生知起居注侍班

十二月次孫稻孫生

除夕侍宴 保和殿

竹垞文類廿五卷刊成高佑顏鼎受纂序

時先生諸稿彙刻於涇川吳岷培董其事

〔按文類曾兩付開雕一二十五卷不列名姓者即是年所刊之本也一廿六卷首頁有布衣秀水朱彝尊錫鬯著一行未審刊於何年〕

南泉寺新建惜字林記 高侍讀扈從東巡日錄序 送汪檢討使琉

球序

二十二年癸亥五十五歲

元旦朝賀

賜宴太和門十三日 賜宴乾清宮是夜 賜內紵表二裏一十五日侍食

保和殿是日再入 保和殿侍宴二十日

名入南書房供奉 賜禁中騎馬三十日

上自南苑回 賜所射兔

二月二日

賜居禁垣景山之北黃瓦門東南充一統志纂修官

三月

駕幸五臺回 賜金蓮花銀盤菇尊復

賜紵

賜御衣帽又

賜醍醐飯鮓魚法酒官羊鹿尾梭魚等物

十一月陸公隴其來會

陸先生年譜朱言宋元諸儒經解今無人表章當日就湮沒又言程朱雖妙然有日月必有衆星有河海必有細流今諸儒一見與程朱異便以為得罪先儒如詩之鄭風亦不敢齒及古注疏所以議論最難

除夕侍宴 乾清宮

夜明木賦 柯寓匏振雅堂詞序

二十三年甲子五十六歲

元日侍宴

天子念講官家人 特賜肴果二席馮孺人九拜受之洵異數也

是月被劾謫官

時輯瀛洲道古錄一書以楷書手自隨錄四方經進書忘者潛請牛學士鈕形之白簡吏議當落職奉

旨降一級

三月自 禁垣徙居宣武門外海波寺街古藤書屋

八月馮孺人浮舟潞河南還

九月

聖駕東巡時丹徒張公鵬巡撫山東先生子昆田在其幕中乃寓書張公當請

立周公後公得書即草奏置行笈中乘間欲上而東野氏裔沛然迎

駕直前

天語甚溫公謂 殊恩宜出自

上遂焚其草

編騰笑集

省方賦 上山東巡撫張公書 題鵲華秋色圖 巖中允瀛臺侍直

詩序

二十四年乙丑五十七歲

周管谷質至京師數過旅話

題李唐長夏江寺圖 題趙子昂水村圖 桂林府石刻元祐黨籍跋

二十五年丙寅五十八歲

春騰笑集七卷刊成查慎行纂序又自為之序

夏輯日下舊聞

以京師為王業根本遼金元明歷代建都於是廼采摭羣書自六經以至百家二氏國史家集方輿海外之記載遺賢故老所傳聞靡不蒐錄分一十三門

輯經義考

（居易錄）竹垞過邸舍云近著一書曰經義存亡考以鄭夾漈經籍志作骨而附益之不傳者存其目其傳者略論作者之意辨其得失蓋倣西亭授經圖兼用晁公武讀書志之例也竹垞篤好經學所錄多鄞范氏天一閣永中項氏及曹氏倦圃溫陵黃氏千頃堂秘本

十二月張公內陞昆田隨之入都

鄒縣重修亞聖孟子廟碑

二十六年丁卯五十九歲

秋日下舊聞四十二卷成

冬日開雕徐尚書乾學捐貲鋟木為之作序馮相國溥陳尚書廷敬徐副相元文張侍郎鵬高詹事士奇姜著作宸英皆有序

八月周實南還

中秋前一日高謨苑層雲招先生同陸冰修嘉淑譚左羽瑄朱采章

□劉禹峰中柱集小菰村餞別

冬遊大房山

遠釋志願葬舍利石匣記跋

二十七年戊辰六十歲

二月王阮亭士正來會

二十四日留阮亭食鮑魚麵觀米元章硯山

九月日下舊聞竣工

二十八年己巳六十一歲

三月自古藤書屋移寓槐市斜街

查

慎行

三月晦日飲朱十表兄槐樹斜街新寓同梁藥亭吳震一作詩

云槐街舊與一峰鄰酒甕重開為洗塵最喜今年春帶閨遲來猶作看
花人兩株桃樹手親移紅影紛紛落酒卮特與幽庭添曲折林檎樓綫
縛笆籬古藤陰下三間屋爛醉狂吟又一時惆悵故人重會飲小箋傳
看洛中詩

屬禹鴻臚

尚基

寫小長蘆釣魚師圖

韞光樓印譜序 黃徵君壽序

二十九年庚午六十二歲

補原官

太保孟忠毅公神道碑

三十年辛未六十三歲

秋八月上丁

天子命大學士代祀孔子先生充十哲分獻官

禮畢偕汪祭酒需吳司業馮徧覽國子監進士題名諸碑

往會陸公隴其

先生極口李燾之長編言薛方山未見此書却作宋元通鑑可笑若王宗沐之宋元通鑑則又不過撮拾續綱目成書明人習氣往往如此

馮孺人復由江淮北上

舟行至泊頭運河冰合孺人中寒而病扶入車既至病漸痊

三十一年壬申六十四歲

正月復罷官

三月十七日挈眷出京王翬畫山水送別

五月次東昌分水牕開舟車酷暑馮孺人病又作

六月入汴訪胡司臬 介社

七月廿八日旋里

八月為長孫桂孫完婚

娶徐氏諸暨縣訓導徐尚賢燁然女

九月十八日至杭州遊洞霄宮

時先生甥吳懷祖同行住會城旬餘

十月至衢州

道出西安邑令鹿君祐強先生登岸寓蕭寺中遊爛柯山逗留二十日

十一月朔過常山

初二舟發玉山初十達南昌十二日溯流而上至贛州儲潭廟訪唐裴

諤喜雨詩碑

十二月抵廣州

時昆田客中丞徽蔭朱公宏祚幕中

六 洞霄宮題壁集中作癸酉誤 衢州府西安縣重建儒學記

跋唐衢州刺史嗣江王禕石橋寺詩

三十二年癸酉六十五歲

正月在廣州

陳處士飯先生於光孝寺觀劉鋹所鑄鐵塔

二月挈昆田以歸

十月至當湖 至黃浦東高橋里

江村銷夏錄序 錢學士詩序 尚書宣示帖跋 續書光孝寺鐵塔

銘後

三十三年甲戌六十六歲

二月十四日馮孺人卒

馮孺人行述

三十四年乙亥六十七歲

三十五年丙子六十八歲

夏結曝書亭於荷花池南為遊憩之所

有菱池芋陂桐塔同心蘭砌青桂巖槐泝繡鴨灘落帆步諸景

十月遊山陰寓莫氏

湘湖賦 羊石山題壁

三十六年丁丑六十九歲

三月潘檢討未過訪

上巳日閱曝書亭藏書過天香菴探梅

六月池中紅蓮作並頭花以奉太守黃公家遊

廣寧黃公知嘉興府事修治解宇適諏是日立礎遂貽書請銘其堂

十一月訪平湖李處士延昱

處士以所儲書二千五百卷貽先生查夏重聞之作詩云嘆息詩人失李
頌柘湖回首舊遊非自憐老友今無幾且喜藏書得所歸萬卷又增三
篋富千金直化兩蚨飛平生謬託知交在恨不從渠借一瓶

道珍堂記 及山題壁 叔母賀太君八十壽序

三十七年戊寅七十歲

四月偕查夏重

慎行

入閩長孫

桂孫

隨侍

從玉山至江西鉛山湖口登陸度分水關入崇安遊武巨幔亭九曲諸
勝信宿沖祐宮謁徽國公祠登天遊觀有終老之志

六月抵福州訪汪方伯

楫

汪學使

薇

學使先生門下士試竣率諸生來謁先期為先生介雅

七月發福州林草臣張民瞻追送於洪山橋

十五夜泊埭程至建寧登舟失足墮水已而病瘥度仙霞嶺入衢州界
至語溪與查別

八月初抵家

病猶未痊子昆田憂甚亦病

冬胞弟彥琛彝珩卒

三十八年己卯七十一歲

春

聖祖省方江浙先生至無錫迎

駕

十月二十一日子昆田卒

經義考三百卷成陳相國廷敬毛檢討奇齡纂序

先刊易書詩禮一百六十七卷乾隆甲戌德州盧運使見曾倡捐補刻

一百三十卷至乙亥告竣丙子春

皇上臨幸闕里 見曾表上

為子 昆田 定笛漁小藁十卷

曝書亭著錄八卷成自為序

五舫記 跋石淙碑 大唐類要跋 書羅浮蝴蝶歌卷後 題亡兒

書陶靖節文

三十九年庚辰七十二歲

白蘭谷天籟集序 商父已款銘跋

四十年辛巳七十三歲

二月朔遊吳門登張氏六浮閣

三月遊西湖寓昭慶寺經房

〔西河詩話康熙四十年三月予同朱竹垞諸子過湖上作三日遊第一

日舟中問寶叔塔故蹟嫌舊志不實一謂僧寶所建塔所叔形誤一謂錢王做入觀民建塔保之呼保做叔聲誤然皆無據之言是日有言表忠觀碑在錢王祠者因過觀之次日竹垞赴李都運席未至第三日雨後過二堤覓水仙王祠不得泊舟回峰塔訪小南屏山石壁書蹟

鄭芷畦

元慶書毛朱二先生合像

芷畦自跋壬午春二月予往省會寓昭慶慈壽房時竹垞先生寓經房前後樓相望時時造請親炙其言論丰采甚相得也一日西河先生來過余語余曰今日吳子寶崖顧子搢玉曠分招余與竹垞二三年友讌聚於湖心亭予其同往焉余遂與西河先生步至經房偕竹垞先生至湖上時竹翁先攜杖行余奉西河先生散行此圖是其景象也有一舟繫於柳陰下吳顧二君以手招曰在此遂與兩先生同上舟而吳慶伯先生已先在舟中矣相見之頃慶伯指予問竹垞先生曰此何人曰

此吳興鄭子並畦最能讀書近修其郡志最認真者也遂命舟子由曲院風荷迅流出六橋仍至昭慶寺前一揖而別

(按此跋本不足錄但壬午年先生未嘗至西泠

存以俟考

六浮閣記 靈隱寺題名 南屏題名 劉高士壽序 題江山偉觀

圖

四十一年壬午七十四歲

三月媳沈氏卒

四月 桂孫福孫 析箸

竹垞老人雖曾通籍父子止知讀書不治生產因而家計蕭然但有瘠

田荒地八十四畝零今年已衰邁會同親族撥付 桂孫福孫 兩孫分管辦糧

收息至於文恪公祭田原係公產下徐蕩續置蕩七畝并荒地三分均

存老人處辦糧分給管墳人飯米孫等須要安貧守分回憶老人析箸

時田無半畝屋無寸椽今存產雖薄若能儉勤亦可少供饘粥勿以祖父無所遺致生怨尤倘老人餘年再有所置另行續析此照

輯明詩綜開雕於吳門白蓮涇之慧慶寺

先生輯明詩有年矣初名明詩觀以八卦分編至是定名曰綜以靜志居詩話附焉

纂石柱補記一卷吳興鄭元慶箋釋刊行

鄭元慶石柱記釋自序頃借書醜舫得宋槧石柱記載山川陵墓亡者

三之一其存而不可信者亦三之一吾湖浙西佳郡何不幸而使數千百年文獻無徵至於此極耶竹垞先生惜其殘闕為補記二縣既完且好余乃一一箋釋證其所可信復辨其所不可信甫脫稿先生見之賞擊命鈔副本藏曝書亭

答蕭山毛檢討書 顏魯公石柱記釋序 顧俠君嗽荔集序 跋吳

寶鼎軼字 蘇靈芝易州鐵像跋

四十二年癸未七十五歲

春

聖祖南巡至無錫迎

駕

十一月曾孫振祖生桂孫出

答刑部王尚書論明詩書

附王尚書書庚辰歲魏禹平南還附有一函仰候起居并近刻請政未

奉報書弟亦尋請急歸田不知前書竟得達籤記否張孝廉公車入都

始拜手示曠如復面喜可知也承聞刪定有明一代之詩甚盛甚盛明

詩選者不一家前輩無踰升菴太史夢山太宰二楊公然皆至宏正止

矣後此惟顧氏國雅不失古意若夫意在庀史則取舍未精無關風雅

大樽裁鑒可謂精矣然知其一說而不知其又有一說也故取境甚狹
不足以窮正變之極致先生於此道伐毛洗髓深且久矣今茲之選必
能通兩家之郵盡波瀾之致為三百年中必不可少之書弟又有一言
進者明詩自青邱之後極盛于宏治空同大復為大宗徐昌穀上翼邊
庭實下毗此論定之公言也繼盛于嘉隆滄溟弇州皆萬人敵也惟蹊
徑稍多古調寢失是以不逮宏正作者耳若謂李何已後為種流傳則
是是非俱錯黑白倒置誦詩論世使承學者何所適從此明詩升降一
大關鍵非先生法眼巨手誰使正之故亟以斯語進又選家通病往往
嚴于古人而寬于近世詳于東南而略于西北統惟先生力矯之敝郡
楊夢山先生詩蕭疎簡遠得淵明摩詰之真弟舊有選本今往一冊先
世父隴首集新刻成亦寄上當以大作表墓重耳先從祖季木考功及
劉相國青岳鴻訓仲子孔和詩皆橫空盤卓確有可傳弟皆有定本嗣

當節錄奉寄俠君□□久定交矣匆遽未一癸未上元日弟士正頓首
頓首竹垞先生閣下 昨一函付俠君并以小刻五種請正俠君春闈
失意尚留京師不知前書郵寄否所寄楊太宰夢山詩五言古今體清
真簡遠詩品當在蘇門之次西原之上邊司徒華泉詩五言律沉鬱華
貴往往神到不在李何之下二集皆弟手定蓋天下萬世之公言非鄉
曲之私言也濟寧靳少宰雨城學顏于中丞念東若瀛詩皆確乎可傳

皆有專集蒙陰公宗伯孝與萬暨其弟敬與萬問次齋小東園二集皆

卓然成家宗伯絕句尤工妙時本所錄殊非其至者至先叔祖季木考
功問山亭詩千餘篇說者謂其滔滔莽莽時有齊氣似也至呵之為西
域婆羅門則太過矣今擇其雅馴者錄數十首就正聊以解虞山之嘲
又先叔祖思止仕為姚安府同知詩名不逮考功而雅馴過之有迂園
集十二卷亦附錄數十首以備採擇長山劉節之孔和故相國青岳先

生之子竒士也詩最豪健竒恣人尤磊砢任俠死劉澤青之手益都王
湘客若之故大司徒基之孫精於鑒別博雅嗜古吐納如晉人乙酉殉
節金陵二君人皆可傳今各錄一卷奉寄近刻古懽錄池北偶二種
再往請正情長楮盡不既所言令孫止得杯酒奉候一次弟名專肅

四十三年甲申七十六歲

二月遊洞庭

徐七來請遊洞庭先生偕馮

念祖胡期真沈翼坐赤馬船渡太湖抵西

山宿消夏灣縱遊石公林屋諸勝題名包山寺中

八月過陸元公上沙別業

十一月遊江寧

初七日從鎮江至江寧初九日入朝陽門寓承恩寺

明詩綜一百卷雕刻竣工

輯禾錄

書拓本玉帶生銘後 水木明瑟園賦

四十四年乙酉七十七歲

春

聖駕南巡三月先生至無錫迎

駕越三日朝見

行殿尋

幸浙江四月初九日朝

聖祖於行殿進經義考易書二種

上諭查供奉昇朱彝尊此書甚好留在 南書房可速刻完進呈查公傳

命是日同諸公留

駕

特賜研經博物四字匾額跪領謝

恩而出十二日

駕回蘇州尋同諸公送

駕至無錫臯橋而返

秋至三城訪曹通政寅

曹視釐政兼校書局先生過訪屬輯兩淮鹽筴書

葬外舅馮公暨配胡孺人繼董孺人於馮氏祖塋之旁

(按馮孺人行述云妣胡孺人生母沈氏又馮君墓誌云娶俞氏早卒再

娶胡氏賢而無子與先生行述所云不合何歟

(按馮君墓誌文類中已有非作於此時也)

為內弟原潔金滌立後

十二月曾孫賜書生福孫出

明詩綜序 西陂記 鼯鼠圖跋 寄查德尹書 唐張長史郎官石

記跋

四十五年丙戌七十八歲

正月

葬生祖妣蔡孺人考晦在先生妣鄭孺人叔子荃公叔母陸孺人弟千里弟婦沈孺人三世七棺於下徐蕩先生立雨雪中親視并梓葬畢而返

莆田陳氏九朝編年備要跋 播芳文粹跋 跋洪遵翰苑羣書元

史類編序 棟亭詩序

四十六年丁亥七十九歲

三月

聖祖復南巡先生仍往無錫迎

駕舟

幸浙江朝於西湖 行殿偕相國陳公學士佟公先後酬倡

駕回先生以足疾復發送至五里亭

上遙見顧問內侍曰這是朱彝尊 庶內侍傳問回奏臣是朱彝尊時

御舟行速不及再奏

淳熙三山志跋 景定建康志跋 跋新莽錢范文 杭州洞霄宮提

舉題名記 跋李紫質畫卷

四十七年戊子八十歲

春送查編修慎行入都

先生送至杉青橋值風雪交作誦無將故人酒不敵石尤風二語送別
七月中先生倡始為粥以食餓者

時連年水旱米穀騰貴饑民塞路先生偕朱別駕並問謙先祖司訓公

諱汝肅 字雅文暨里中之好義者每日輪施遠近就食者日數千人

八月二十一日先生八十初度

適有從弟有舟葬六之戚罷稱觴焉

編曝書亭集八十卷成潘檢討未序

兩淮鹽筴書二十卷成

嚴氏春秋傳注跋 書新安志後 後周幽州刺史贈少保豆盧恩碑

跋 唐龍門奉先寺盧舍那像龕記跋 唐崇仁寺陀羅尼石幢記跋

唐郎官石柱題名跋 明正音跋

四十八年己丑八十一歲

正月復為粥於古南禪院

時菽麥未熟饑民轉多先生復偕諸公為粥於古南禪院請太守臧公

委官董其事每日就食者幾二萬人自二月初至三月中乃止

四月至維揚留真州

交所輯鹽莢書於曹通政許為刊集適李大理煦李都運斯佳來會都
運尋以畫舫送行

六月丁未舟發江都渡江而歸

七月發雕曝書亭集

每日刪補校勘忘其勞焉未幾先生下世至甲午六月竣工查編修慎
行復為之序

九月得澤州陳公寄懷長律

先生誦其入直居人後投林在鳥先等句謂可稱詩史

十月十三日子時卒

初七日值掃少保東山公墓先生感微疾不能往明日起坐娛老軒中
閱書微有倦態食粥一甌午後不復進食自此寒熱間作然神氣如故
謂次孫稻孫曰吾集不知何時可刻完年老之人不能久待奈何又謂

建文實錄曲學紕繆附會成書我病少差尚當考正續為之無使後世

滋惑也從子襲遠

甫田

自吳門來問疾先生張目曰汝吳中來知太守

陳公近績否次日桐鄉錢女夫

琰

來先生以同時被薦百九十餘人皆

著作之材不可無傳思輯為鶴書集未暇采錄因屬其踵成焉

謙少時於王格

村紫頭見先生手藁數十番名鶴徵錄

至晚猶數問局中剗事俄而微睡聲息漸沉至

漏下三鼓遂長逝矣

五代史記注序

跋元豐九域志

續題溪州銅柱記

開元太山銘

跋 樵李賦

古南禪院重建方丈記

跋濟生拔萃方

雍正三年乙巳

葬先生於百花莊文恪公墓南五里澤州陳公

廷敬

墓志銘

查

慎行

偕德尹弟至梅里送竹垞表兄葬詩云平生載酒論文地今日

偕為執紼行萬卷書留良史宅百花莊近相公塋銘傳有道辭無愧淚

落天傭表未成十七年來餘痛在待看宿草慰哀情

〔按〕嘉興府志翰林朱

彝尊

墓在王店北婁家橋誤〔浙江通志檢討朱

彝

尊墓在百花莊朱文恪賜塋之西南敬業堂續集卜兆百花莊距文恪

公賜塋五里